



PRESS SECRETARIAT

MINISTRY OF THE PRIME MINISTER & CABINET

Apia, Samoa

Telephone : (685) 63222 ext 746, 747, 748, (685) 24799, (685) 26397

Fax : (685) 26322 Email: presssecretariat@samoa.ws

Press Release

18 August 2008.

1. Malaga le Afioga i le Palemia.

Ua faamaonia e le Kapeneta le auai atu o le Afioga i le Palemia, le Susuga Tuilaepa Sailele Malielegaoi, i le Fono a Taitai o le Pasefika, e faia i Niue mai le aso 19 – 21 Aokuso 2008.

O mataupu o le a talanoaina i lenei fono e aofia ai le: puipuiga o le Pasefika e aofia ai ma le polokalame o le RAMSI, faapea ma fuafuaga a le Forum mo le toe faafoi lea o le Malo o Fiti i faiga faatemokalasi; talanoaina o le Lipoti Faaletausaga mo le faatinoga o le Pacific Plan, siosiomaga, malosiaga, faigafaiva, tuufaatasia o le SOPAC ma vaevae ana polokalame i lalo o le SPC ma le SPREP; sueina o se Sui e tauave le tofiga o le Failautusi Sili o le Forum; ma nisi mataupu taua e pei o le siisii pea o le tau o le suauu ma mea taumafa, o mataupu tau niukilia i le va o le Marshall Islands ma le Iunaite Setete o Amerika, faatasi ai ma mataupu tau i femalagaiga.

E malaga faatasi le Afioga i le Palemia ma le Pule Sili faapea ma le Pule Lagolago o le Matagaluega o le Vaifafo, ma le Sui Faatu a Samoa mo le tofiga o le Failautusi Sili o le Forum, Tuiloma Neroni Slade.

2. Malaga Lana Afioga Mamalu le Ao o le Malo i Hawaii.

Ua faamaonia e le Kapeneta le malaga atu o Lana Afioga Mamalu le Ao o le Malo, Afioga Tuiatua Tupua Tamasese Efi, e talivalaau i lona valaaulia mai le Iunivesite o Hawaii i Manoa.

Ua moomia mai e le Iunivesite o Hawaii Lana Afioga Mamalu mo le faia o sana saunoaga aloaia, aso 26 Aukuso 2008, e faatatau i le lomiga faasalalau fou o le tusi ua faaliliuina, “Indigenous Dialog on Faith, Peace, Reconciliation and Good Governance”. O loo aofia ai i le polokalame o le malaga le feiloaiga ma taitai o le Setete o Hawaii faapea foi le mamalu o tupu ma ē’e o le atunuu o loo alala i lea Setete.

E auai i lenei malaga le Afioga i le Masiofo, Ofisa Sili o le Matagaluega a le Palemia ma le Leoleo Faafeao.

3. Tuuina le Mataupu a le Asosi Soka a Samoa i le Komisi Faamasino o Feeseeseaiga tau Taaloga a Samoa.

Ua faamaonia e le Kapeneta le talosaga mo le tuuina atu o le mataupu a le Asosi Soka a Samoa (SFSF) i luma o le Komisi Faamasino o Feeseeseaiga tau Taaloga a Samoa.

O le aso 9 Iuni 2008, na faatuina ai e le Sosaiete Soka a le Lalolagi (FIFA) se Komiti Aloaia n ate vaavaai i le mataupu e pei ona aafia ai le Asosi Soka a Samoa, i se aitalafu e tusa ma le ST \$1.7 miliona.

Peitai e le mafai ona faatino le galuega a lenei Komiti ona ua le tuuina atu i ai le lagolago a le Asosi Soka a Samoa. Ma ua faasilasila mai e lenei Komiti le lē toe avea o Samoa ma sui auai o le FIFA. Ua faailoa mai foi e le Sosaiete Soka le Itulagi o le Pasefika (OFC) o le a faasalaina le Sosaiete Soka a Samoa e ala i le aveeseina mai i ana faiga faapaaga ma le FIFA.

O le Vaega II o le Tulafono o Fofu mo Feeseeseaiga tau Taaloga Samoa 2008 (tulafono) ua faatuina ai se Komisi Faamasino e fofogaina ia feeseeseaiga tau taaloga.

Ua faamaonia foi e le Kapeneta le: tofia o ni sui se toalua mai le lisi o le Komisi Faamasino o Taaloga e fofogaina faatasi ma alii faamasino le feeseeseaiga; fautuaina o le Ao o le Malo (i) ina ia tuuina atu lenei feeseeseaiga i le Komisi Faamasino o Taaloga, (ii) faamaonia o Sui e toalua ua filifilia e le kapeneta; ma, faatonuina le Loia Sili e tapena ia Poloaga talafeagai mo le sainia e le Ao o le Malo.

4. Lipoti i le Faiga Faavae i le Auina atu o Tatou Tagata mo Galuega le Tumau i Niu Sila.

Ua faamaonia e le Kapeneta le lipoti i le Faiga Faavae i le Auina atu o Tatou Tagata mo Galuega le Tumau i Niu Sila.

- (a) I le atoa ai o le tausaga muamua o le faiga fou lenei a le Malo mo le saili galuega o tatou tagata i Niu Sila e galulue ai i Faatoaga, ua 622 tagata ua faamanuiaina ai.
- (e) Ona o le tau malulu o i ai nei Niu Sila, ua tele ina toe fo'i mai o tatou tagata . Vagana le 23 o loo faaauau pea ai mo galuega o le tau malulu.

(i) Silia i le 7 Kamupani Faa-Faatoaga na faigaluega ai o tatou tagata. Peitai, e tasi le Kamupani, Mr Apple Ltd na ia faafaigaluegaina le 315.

(0) Tolu auala o loo faaaoga mo le faafaigaluegaina o tatou tagata:

(i) Faafoe e le Malo le filifiliga

(ii) Faatalanoa sa'o lava e Kamupani

(iii) O le faaaoga o So'o (Agents) faapitoa a le Kamupani lava ia.

Mo le Malo lava ia, e 2,100 tagata o loo i ai i lana lisi faatalitali e valaaau mai loa se Kamupani, fai loa ma le filifiliga.

(u) O le faiga o loo faafoe ai le tatou filifiliga, o loo pito sili ona maopoopo nai lo isi Motu o le Pasefika.

5. Lipoti Fono i le Va o Malo o le Pasefika (Pacific Islands Forum) ma le Malo o Italia: 5-8 Iuni 2008

Ua faamaonia e le Kapeneta le lipoti o le fono sa usua i Toga ia Oketopa 2007, e talanoaina ai le avea o Italia o se Pa'aga a Atunuu o le Pasefika. O lenei fono na fuafuaina e faataunuuina i le tausaga fou (2009), peitai o le naunautaiga lava o Italia e galulue so'oso'otauau ma atunuu o le Pasefika na talosagaina ai le toe tu'uina mai i luma i le 2008.

Ua maea nei ona sainia le Maliega a Atunuu o le Pasefika ma faamautuina ai loa le fesoasoani mai o Italia i le atiina ae o le tamaoiaiga o atunuu o le Pasefika. O mataupu la nei o le fono na talanoaina tusa ai ma le faiga faapa'aga ma Italia:

- a. A'afiaga o Atumotu laiti o le Pasefika i le fesuaiga o le tau (Climate Change);
- e. Renewable Energy – Alternative Solutions to Fossil Fuel.

I le talanoaina ai o nei mataupu, e lua mataupu na tu'uina atu e le usugafono a Samoa:

- i. O le fesoasoani malosia lea o Italia i lu'itau o loo feagai ai ma Samoa i le toe auai o Samoa i totonu o le li'o o atunuu tauatia'e.
- ii. O se avanoa lelei foi lea mo atunuu o le Paefika e maua ai se fesoasoani tau tupe aua le faatupeina o poloketi mo le faaitiitia o a'afiaga i le fesuaiga o le tau, a e le gata i lea o nisi o auala mo le renewable energy.

O le faatupeina o lenei faigapa'aga, o loo galulue faatasi ai Malo o Italia ma Austria faatasi ai ma le aai of Milan. O lenei foi faigafaapa'aga e maua ai foi ma avanoa e a'oa'oina ai ofisa talavou mai le Pasefika i mataupu i upufai ma le va nonofo ai o Malo. E tusa ma le EU 500,000,000 se vaega tupe ua folafolaina mai e Italia, Austria ma le City of Milan e fesoasoani i le atiina ae o le tamaoaiga o atunuu o le Pasefika.

Government Press Secretariat.